

Judas

Judas ishim Porrosht aabo ör saludo.

¹Yok Judas. Yok Jesucristo ir ibik, hn yok Santiago ir leshap. Tichew ana hutita par tokosim erze uje Porrosht uu eyok Deych chihla örkite hn sahmür ör. Wir uje Jesucristo tibey ör. ²Sehe tuu Porrosht nuuna uje olak losuhlaabo hn takashim olak hn duhu olak aho kiis hn duhu ma ahmürloye.

Ode uje otsehnyër Porrosht aabo.

³Pishibo watsaklo, wapni sehe tichew hutita par titim olak uje Jesucristo tooho krus eeychkite hn ishi eyok hnitewihi Porrosht ahir per ye tichewpe. Shi tichew ana hutita yata. Ma om uje titim olak par uje ye otiislo Jesucristo ir ahwoso hn moymlö. Ich ye ahwoso kinäho chihipe, shi erze uje oyanimiräha. ⁴Hnakirbo yewo ode uje öya olak. Wir ochii ire Porrosht aaboho. Ich osdeyo uje Porrosht chibite uje tyenij shuu otir urhuta bahluta ehethene. Wir ye Porrosht aabope. Erze uje ich om uje Porrosht ishim eyok wir otsahmür toy per oshuu ir ahwoso poshik par uje oshiyokör uje ich mihnuwo. Wir shi sehe odishew timcher par uje oshiyokör uje ich mihnik. Wir otsitak uu eyok yinsirc uje shi sohmira. Wichu uu eyok Irhich Jesucristo.

⁵Olak ich nos erahalo per sehe tuu hap uhu olak eyucha uje eyok Irhich chiyuhu erze Israel oso ese egipto oso ör hnimich ehethene, per deeych yetkithene hn nos sihna erze Israel oso uje otsotiis ire. ⁶Porrosht sepyer ir anjele toy. Wap chibite par uje oshiyokör debiyo per ode uje oym lawich heke Porrosht chirmas ör shuu otir ese owich uje ich dihlelt data. Porrosht shiyeru ör par uje shi oyem ese deeych uje tyenij sepyer ör nehe. ⁷Porrosht sepyer erze oso uje odebuhu dit Sodoma hn dit Gomorra hn nos wir duwo uje de ahir toy. Erze oso ich oshiyokör uje ich mihnuwo pishokithene itso erze hnakirbo uje yesh otsehnyer olak. Erze hnakirbo hn timcher uje ode dit Sodoma hn dit Gomorra ye ohnöyhi pishye ahirpe. Otorähaye, hn timcher timcher öhiyer ahir hn hnakirbo hnakirbo öhiye ahir. Otsahat loshipo hn oshuu loshipo sahat ire. Pikhnino hn pikhnine

nos oshiyokōr itso ōr, heke Porrosht sēru ōrkite. Porrosht shiyokōr shuu itsorz par nos oso ochiraha uje nos sepyēr ōr nehe chibite ōr asa urhuta bahluta etet waa je yelij nihna ire.

⁸Erze hnakirbo uje otsehnyēr olak wir shi itso erze dit Sodoma hn dit Gomorra oso. Ochibite uje nīhyok uje yeēk sepyēr ōr nehe uje oshiyokōr uje ich mīhnūwo, heke oshiyokōr mīhnuwōhoye. Wir ye otola ōr bahluwope, hn ochish majamichīhi erze ōr bahluwo uje ma ōr deyo. ⁹Per uje erze anjele ōr bahlut pisht uje iich otsii Miguel hōr dyablo oshiyokosyeehe Moisés yūhurrza hn Miguel ye dish majamichīhi dyablope. Shi tatim dyablo im: —Tyenij Irhīch sepyēr owa nehe.— ¹⁰Per erze hnakirbo uje otsehnyēr olak ochinehnim erze kuche uje ōr ire ye odirehepe. Wir shi ōr itso loshipo. Shi oshiyokōr uje ōr ire otsahmūr. Erze uje ōr ire oshiyokōr wir je deeych yet nehe hn sihna ōr. ¹¹Ich yarhakpa erze uje tyenij tīr ōr nehe uje otsehnyēr olak. Wir ōr iluu shi itso uu Cañ lishi ir iluu. Shi oshiyokōr oshuu ire itso uu Balaam uje shi sahmūr hnote heke iim shiyokōr uje Porrosht sahmūr. Porrosht tyenij sepyēr ōr shi itso uje sepyēr Coré hōr pork wir ōr prowa sehe odiyuhu Moisés uje Porrosht chibite par ōr bahlutkite. ¹²Olak uje ahakōrlo ōr ahamich par uje aaklo ich wir erze uje otsehnyēr olak odechi olak ahir. Wir ich okuytim erze oposo par uje otaak hn oho hn ye oduhu deyuwo tisirīhi yewope. Wir shi ōr itso erze ukuhir uje shi myent hnoy par uje ye ibikpe, hn shi ōr itso pohir uje terihi ishirīt per ye eērirsh hn kako hn ochiyuhu ir uro. ¹³Ōr itso onoota bahluta wokor ahlibe uje de wirc. Erze ōr ahwoso uje ochiyuhu ich shi itso erze ot wokor ahlibe. Uje otata lahwoso uje ich mīhnū pisho ich ye opookpe. Wir shi ōr itso porrzeebe uje tokolihi lawich hn hno tīr lawich uje dihlelt data. Porrosht chibite erze par uje shish odechi ese owich uje ma dihlele.

¹⁴Adán hn ir iiso nehech oterīhi Enoc wir ōr syete. Ese Enoc tata uje Porrosht sole: —Hmeychīm uje Irhīch tīrēt ich anjele okihniya ōya ire ¹⁵par uje nos sepyēr erze uje oshiyokōr uje ich mīhnūwo hn par chibite orhōta nos wir erze kuche mīhnūwo uje ōr ire oshiyokōr pork ye onahmūr Porroshtpe. Oshiyokōr uje Porrosht ye nahmūrpe, hn nos tyenij chibite orhōta nehe erze ahwoso mīhnūwo uje ōr ire otata. Ochiyuhu lahwoso mīhnuwōho Porrosht.— ¹⁶Erze uje otsehnyēr olak shi otukuhna dejerpta uje ochiilehet hn yelij oduhu laho kiis. Shi sehe oniyokōr uje ōr ire otsahmūr. Shi onarim ire ich otsihnew par uje sehe oduhu yewo onunt. Wir shi onarim olak par uje oshuu olak aho kiis hn sehe olapur olak kuche.

Porrosht aabo tyenij otsontew erze uje otsehnyēr ōr.

¹⁷Pishibo watsaklo, tyenij olak eyucha erze eyok Irhīch Jesucristo ir apóstole ōr ahwoso uje otata uje tyenij tokole nehe. ¹⁸Erze apóstole

otatim olak otsii: —Uje yej terihi ĩrmo uhurc nehe ich ode uje shi ochiyuhu lahwoso mihnuwõho Porrosht. Shi sehe oniyokõr erze mihnuwo uje õr ire otsahmũr.— ¹⁹Wir shi sehe oduhu oso odehek ire. Shi oshuu deyuwo tisirĩhi kuche uje de nãhu ĩrmo. Ye Porrosht Ichibich chihi õr ahope. ²⁰Pishibo watsaklo, ye ahakõrlo uhu olak ilo õr. Shi tyenij ma ye otiislo Porrosht. Uje olak orar ich uhulo Porrosht Ichibich niyokorãha olak. ²¹Ye ekeylo uje Porrosht sahmũr olak par uje ye ahakõrlo kuche mihnuwo uje ire ye nahmũrpe. Eyok Irhĩch Jesucristo sosir olak. Shish anemlo ese deeych uje hnoy olak seya olak poõrc uje olak ikirĩt de uje yelij nihna ire. ²²Akashimlo erze Porrosht aabo uje õr koswãha ire uhulo ye õr koswãha, ²³hn akashimlo erze uje ye õr Porrosht aabope par uje uhulo omasaha par Porrosht aabo. Uhulo ilo uje eyuhulo orĩhi jwekita eheth, hn eenilo uje yewo õr losuhlaabo uhulo omasaha par Porrosht aabo per tyenij etaklo erze õr iluu mihnu uje oshiyokõr. Erze õr iluu mihnu wir shi itso õr ishuwo uje oyãha uje ich mihnu pisho.

Porrosht aabo tyenij oshuu Porrosht ich dich.

²⁴Titim olak. Porrosht ir ukurbo deyo de. Wichĩ tibey olak par uje ye ahakõrlo erze kuche mihnuwo. Wichĩ tyenij hnoy olak seya olak dekich nehe uje ich ye olak hnitew chihi ire ahĩrpe. Ire ich hũre hn ich ayla uje aachihilo ire ahĩr. ²⁵Porrosht shi sohmira. Wichĩ shuu eyok Irhĩch Jesucristo ishi eyok hnitewihĩ dahĩr. Sehe tuu oso oduhu Porrosht ich dich. Wichĩ ich hũre hn ich dichpa hn ir ukurbo deyo de. Porrosht nos shiyokõr uje ire sahmũr. Wichĩ dekite nehech ele ahle hn shish de nehe. Shi ahnuwo uje sehe titim olak.